



REPUBLIKA E SHQIPËRISË  
KËSHILLI I MINISTRAVE

PROJEKT VENDIM

Nr. \_\_\_\_\_, datë \_\_\_\_\_.\_\_\_\_.2016

**PËR**  
**KRIJIMIN DHE MËNYRËN E ORGANIZIMIT E TË FUNKSIONIMIT TË**  
**AGJENCISË PËR EFIÇENCËN E ENERGJISË DHE TË**  
**ADMINISTRATAVE RAJONALE PËR EFIÇENCËN E ENERGJISË**

Në mbështetje të nenit 100 të Kushtetutës, të nenit 6, të ligjit nr. 90/2012, datë 27.9.2012, “Për organizimin dhe funksionimin e administratës shtetërore” dhe të nenit 25, të ligjit nr. 124/2015, datë 12.11.2015, “Për Efiçencën e Energjisë”, me propozimin e ministrit përgjegjës për energjinë, Këshilli i Ministrave

**VENDOSI:**

**I. KRIJIMI I AGJENCISË PËR EFIÇENCËN E ENERGJISË**

1. Agjencia për Efiçencën e Energjisë (AEE) është person juridik publik, buxhetor, në varësi të ministrit përgjegjës për energjinë, me seli në Tiranë.
2. AEE-ja është përgjegjëse për zbatimin e politikave dhe nxitjen e masave për efiçencën e energjisë.

**II. ORGANIZIMI DHE FUNKSIONIMI I AEE**

1. AEE-ja ka statusin e Drejtorisë së Përgjithshme dhe organizohet në nivel qendror dhe rajonal.
2. AEE-ja drejtohet nga Drejtori i Përgjithshëm, i cili organizon dhe drejton të gjithë veprimtarinë e kësaj agjencie dhe përgjigjet para ministrit përgjegjës për energjinë.
3. AEE-ja financohet nga buxheti i shtetit dhe nga burime të tjera të ligjshme. AEE-ja administron të ardhurat nga buxheti i shtetit dhe ato të siguruar nga

donacionet dhe shërbimet ndaj palëve të tjera, sipas legjislacionit përkatës në fuqi.

4. Funkcionimi i brendshëm i AEE-së bëhet sipas rregullores përkatëse, të miratuar nga ministri përgjegjës për energjinë, me propozimin e Drejtorit të Përgjithshëm të kësaj agjencie.
5. Struktura dhe organika e punonjësve të AEE-së miratohet me urdhër të Kryeministrit.
6. Marrëdhëniet e punës së Drejtorit të Përgjithshëm dhe nëpunësve qëndrorë të AEE-së rregullohen sipas procedurave të parashikuara në ligjin nr. 152/2013, “Për nëpunësin civil”, i ndryshuar.
7. Marrëdhëniet e punës së punonjësve të administratës rajonale të AEE-së rregullohen sipas Kodit të Punës.

### **III. PËRGJEGJËSITË DHE DETYRAT E AEE**

1. AEE-ja ushtron juridiksionin dhe veprimtarinë e saj në të gjithë territorin e Republikës së Shqipërisë, përmes zyrës së saj qendrore, në Tiranë dhe administratës rajonale në nivel qarku.
2. AEE-ja ka detyra dhe përgjegjësi si më poshtë:
  - a) të përgatisë, të zbatojë dhe të monitorojë politikat dhe programet për përdorimin eficient të energjisë në sektorët rezidencialë të shërbimeve, të industrisë, të transportit dhe të bujqësisë;
  - b) të përgatisë dhe të monitorojë Planin Kombëtar të Veprimit për Efiçencën e Energjisë;
  - c) t’i paraqesë çdo vit ministrit një raport të hollësishëm lidhur me zbatimin e Planit Kombëtar të Veprimit për Efiçencën e Energjisë;
  - d) të bashkëpunojë me autoritetet qendrore dhe vendore, shoqëritë që operojnë në objektet industriale dhe organizatat e ndryshme jofitimprurëse për krijimin dhe përditësimin e bazës së nevojshme të të dhënave të energjisë, përfshirë llogaritjen e treguesve të efiçencës së energjisë, si dhe për zbatimin e masave për nxitjen e efiçencës së energjisë;
  - dh) të përgatisë dhe t’i propozojë ministrit aktet e nevojshme nënligjore për nxitjen e efiçencës së energjisë, siç parashikohet në ligjin Për Efiçencën e Energjisë dhe në ligjin Për Performancën e Energjisë në Ndërtesa;

e) të përgatisë standardet, normat dhe rregulloret teknike, me qëllim rritjen e efikasitetit të energjisë së pajisjeve, aparaturave dhe makinerive që përdoren për prodhimin, transportin, shpërndarjen dhe konsumin e energjisë në sektorët rezidencialë të shërbimeve, të industrisë, të transportit e të bujqësisë;

f) të vlerësojë teknikisht projektet e investimeve në fushën e efikasitetit të energjisë, të paraqitura pranë Fondit të Efikasitetit nga subjektet e interesuara;

g) të lidhë marrëveshje vullnetare sipas përcaktimeve të nenit 12, pika 3, sipas ligjit nr. 124/2015 “Për Efikasitetin e Energjisë”;

gj) t’i propozojë Fondit dhënie e mbështetjes financiare për projektet që aplikojnë për financime nga Buxheti i Shtetit dhe burime të tjera të brendshme ose të jashtme për marrjen e masave për efikasitetin e energjisë, sipas parashikimeve të nenit 12, pika 3, sipas ligjit nr. 124/2015 “Për Efikasitetin e Energjisë”;

j) të përgatisë kontrata standarde për shërbime energjetike që financohen nga Fondi, të cilat miratohen nga ministri dhe t’i publikojë ato në faqen e saj zyrtare;

k) të koordinojë programet e efikasitetit të energjisë, të financuara nga institucionet ose organizatat ndërkombëtare, mbështetur në marrëveshjet qeveritare;

l) të bashkëpunojë me institucionet dhe organizatat vendase dhe ndërkombëtare, me qëllim përdorimin me efikasitet të energjisë dhe reduktimin e ndikimit negativ në mjedis;

m) të këshillojë autoritetet e administratës publike vendore, administratorët e ndërtesave publike dhe atyre me destinacion banimi për përgatitjen dhe zbatimin e projekteve të efikasitetit të energjisë;

n) të bashkëpunojë me organet akredituese, për marrjen e informacionit mbi rezultatet e testeve dhe matjeve, për përmbushjen e standardeve kombëtare të efikasitetit të energjisë;

o) të zhvillojë dhe të koordinojë programet e trajnimit;

p) të këshillojë konsumatorët fundorë për programet e efikasitetit të energjisë të ndërmarra prej tyre;

q) të mbështesë dhe të këshillojë kryerjen e fushatave të ndërgjegjësimit publik dhe veprimtarive të tjera edukative lidhur me nxitjen e efikasitetit dhe kursimit të energjisë;

- r) të verifikojë, në rast se e çmon të nevojshme, saktësinë e të dhënave të raporteve të hartuara nga një auditues energjetik;
- s) të mbikqyrë dhe verifikojë, në rast se e çmon të nevojshme ose në rast se indentifikohen parregullsi, të saktësisë së të dhënave të raporteve të hartuara nga një auditues energjetik;
- t) të mbledhë dhe administrojë të dhëna të monitorimit;
- u) të mbajë dhe përditësojë bazën e të dhënave me regjistrin e audituesve të energjisë, kompanive të shërbimit të energjisë, kopje të certifikatave të energjisë, raporteve të auditimit, raporteve të verifikimit, bilance të konsumit të energjisë të ardhura nga deklarimi i konsumatorëve të mëdhenj;
- v) të kryejë aktivitete të tjera me interes publik në bazë të dispozitave ligjore dhe akteve të tjera ligjore në fuqi;
- x) të vendosë masa administrative, sipas ligjit Për Eficiencën e Energjisë dhe ligjit Për Performancën e Energjisë në Ndërtesa;
- y) të lajmërojë organet shtetërore kompetente në rastet kur vërehen shkelje administrative, veprime apo mosveprime në kundërshtim me ligjin, duke u propozuar organeve përkatëse marrjen e masave disiplinore ndaj personave përgjegjës, si dhe përgatitjen e kallëzimit penal për veprat penale të vëna re gjatë ushtrimit të kontrollit dhe paraqitjen e tyre pranë organeve përgjegjëse, sipas legjislacionit në fuqi.

#### **IV. STEMJA DHE VULA ZYRTARE E AEE**

1. AEE-ja ka stemën, logon dhe vulën e vet zyrtare, të cilat miratohen me urdhër nga titullari. Stema përbëhet nga Stema e Republikës së Shqipërisë me shënimet: “Republika e Shqipërisë, Ministria e Energjisë dhe Industrisë, Agjencia për Eficiencën e Energjisë”, në përputhje me përcaktimet e Vendimit nr. 474, datë 10.7.2003, të Këshillit të Ministrave, “Për mënyrën e përdorimit të Stemës së Republikës, si dhe raportin e përmasave të saj”.

2. Vula zyrtare e AEE-së ka formën dhe elementet e përcaktuara në pikën 2, të Vendimit nr. 390, datë 6.8.1993, të Këshillit të Ministrave, “Për rregullat e prodhimit, administrimit, kontrollit dhe ruajtjes së vulave zyrtare”, të ndryshuar. Vula e AEE-së prodhohet, administrohet dhe ruhet në përputhje me legjislacionin në fuqi.

## **V. DISPOZITA TRANZITORE DHE TË FUNDIT**

1. Ngarkohet Ministri përgjegjës për energjinë, që të marrë masa për akomodimin e AEE-së në mjedise të përshtatshme pune, si dhe të marrë masat e duhura për financimin me fonde buxhetore të AEE-së për vitin buxhetor 2016.
2. Dispozitat e këtij vendimi në lidhje me mënyrën e rekrutimit të nëpunësve të Agjencia për Efiçencën e Energjisë, sipas pikës 6 të Kreut II të këtij vendimi, i shtrijnë efektet gjashtë muaj pas hyrjes në fuqi të këtij vendimi.
3. Efektet financiare, që rrjedhin nga zbatimi i këtij vendimi, të përballohen nga buxheti i shtetit.
4. Ngarkohet Ministria e Energjisë dhe Industrisë dhe AEE për zbatimin e këtij vendimi.

Ky vendim hyn në fuqi pas botimit në Fletoren Zyrtare.

**K R Y E M I N I S T R I**

**EDI RAMA**

**MINISTRI I ENERGISË DHE INDUSTRIË  
DAMIAN GJIKNURI**